

## En memoria da Maria-Ursula Schmid-Caminada



Tut ruasseivel e tgeu has ti bandunau nus per adina.

Nossa mumma ei naschida ils 28 d'october 1928 a Danis sco feglia da Georg e Maria Caminada. Cun pér in onn ha ella piars sia mumma. Damai che siu bab luvrava sco luvrer d'uaul e saveva buca haver quitau dalla pintga Mariuschla, ha ella astgau passentar sia affonza a Vrin tier siu tat e sia tatta, che vivevan ella medema casa sco siu aug e sia onda cun lur famiglia. Aschia eis ella carschida si ensemen cun 9 cusrins/as ils quals eran per ella sco fargliuns.

Suenter la scola ha ei giu num da segidar el menaschi puril, sco ei era da gliez temps usit. Pli tard ei nossa mumma stada en differentas plazzas. Cun 20 onns eis ella ida a Sedrun en piazza

tier Albert pec e sia dunna ell'ustria Badus. A Sedrun ha ella entuppau per l'emprema gada il Vigeli. Quei giuven cletg ei denton puspei vegnius sepa-raus cun quei che la mumma ha stuiu turnar ella Lumnezia.

Zatgei temps pli tard ei nossa mumma stada per in onn en cura ad Arosa, suenter la greva malsogna da «Tuberkulosa». Per haver cauld el freid unviern ad Arosa, ha la mumma cumprau caultschas liungas e caudas. Da quei temps targevan las dunnas adina mo en schuba ni rassa. Suenter quei onn ad Arosa eis ella turnada a Vrin. Ina dumengia ei la giuvna ida a messa cun en sias bialas caultschas. Igl augsegner ha naturalmein immediat viu quei e duront il priedi ha el buca emblidau da menziunar, che la nova moda dallas dunnas seigi para dad haver en caultschas. Naven da lu vesevan ins perfin a Vrin dunnas cun caultschas.

Nov onns suenter che Mariuschla ha giu bandunau Sedrun eis ella turnada ella biala Val Tujetsch ed aschia era tier siu Vigeli. Per buca puspei sepiarder, han els el meins settember 1957 festivau lur nozzas. La lètg ha benediu els cun 9 affons, 4 buobas e 5 buobs. La mumma aveva adina il giavisch dad ina gronda famiglia, cun quei ch'ella aveva sezza negins fargliuns. Lur

giavisch ei ius en vigur e lur famiglia dumbra oz buca mo 9 affons mobein era 20 biadis e 15 sutbiadis. Dallas visetas da ses cars haveva ella adina grond plascher, ed era nus tuts gudevan il temps ensemen cun ella. Cunzun sin ils buns spaghettis cun tomata selegravan buca mo nus mobein era tut ils biadis.

Nossa mumma era buca ina femna sportiva, mo las cuorsas da skis sin la televisiun gliez stueva ella mirar, principalmein era ella incantada dallas cuorsas rapidas. Aschia ch'ei saveva era inagada ni l'otra vegnir avon ch'il gentar vegneva survius en stiva avon la televisiun.

Sper las cuorsas da skis astgavan sias spassegiadas mintgadi buca muncar. Siu iert era sia passiuin, dil qual ella haveva adina bien quitau. Oravontut sias bialas rosas contschinas avon casa carschevan ad in crescher.

Vrin ei denton restau per Mariuschla sia patria. Ella ha adina puspei visitau QUELS da Vrin, sco ella numnava sia famiglia ella Val Lumnezia. Biaras gadas havein nus fatg cun nossa mumma ina viseta a Vrin ed adina entupava ella personas per dar ina paterlada. Quei scheva tarlischar ils eglis dalla mumma. Igl onn 2014 ha la mumma piars nies car bab Vigeli, il qual habitava da quei temps ella casa da tgira a Sedrun. Las biaras, bialas e custeivlas regurdientschas ch'els han passentau en-

semen e cun sia familia ha ella adina purtau el cor.

Ils davos onns han las combas empau mudergiau la mumma. Suenter in cuort temps el spital ha ella ils 9 da schaner 2020 priu dimora ella casa da tgira, La Pumera a Glion. Leu ha ella puspei entupau amitgas ed amitgs dil temps da scola. Mariuschla gudeva las numerusas visetas da sia gronda famiglia ed era bugen en siu sessel cun ina buna lectura.

Nossa mumma ha viviu sia veta cun bia cuntentientscha e priu mintga di sco ei vegneva, senza selamentar. Ella era ina tafra e fina dunna ed haveva adina buna luna. Ed aschia vegnin nus era a tener ella en buna regurdientscha. Igl 1. da mars ha nossa mumma bandunau nus per adina. Ella ei ida aschi ruasseivel e tgeu sco ella ha viviu.

Carschida si ei nossa mumma cun 9 cusrins/as, ella ei suenter 9 onns turnada ella Val Tujetsch, ella ei maridada el 9avel meins digl onn ed ei vegnida benedida cun 9 affons, ils 9 da schaner ei ella secasada egl asil e suenter 9 onns eis ella ussa puspei unida cun siu car um Vigeli el parvis.

Cara mumma, per nus tuts eis ti stada la megliera mumma, la megliera tatta e la megliera basatta, nus schein encrescher per tei. Ruaussa en pasch.

*En carezia tia famiglia*